



Communicaziun a las medias

Data 27 d'avust 2012

Ina emprima bilantscha positiva per ils premis federals da litteratura

Il 15 d'avust 2012 è stà l'ultim termin per l'inscripziun a l'emprima Concorrenza federala da litteratura. La giuria federala da litteratura vegn a premiar maximalmain nov ovras da las 236 inoltradas. L'Uffizi federal da cultura fa ina emprima bilantscha positiva constatond ch'i è vegnidas inoltradas numerusas ovras che reflecteschan la diversità litterara e linguistica da la Svizra. Da las ovras inoltradas a l'emprima ediziun da la concurrenza èn 123 scrittas en tudestg, 84 en franzos, 28 en talian ed ina en rumantsch.

Tranter ils 26 da zercladur ed ils 15 d'avust 2012 èn vegnidas inoltradas tar l'Uffizi federal da cultura 236 ovras per l'emprima Concorrenza federala da litteratura. La diversità litterara e linguistica da las ovras inoltradas permetta da far ina emprima bilantscha positiva. Las ovras en franzos ed en talian èn fitg bain represchentadas en congrual cun la repartiziun da las linguas principalas en la populaziun¹. Da las ovras annunziadas èn 36% scrittas en franzos (20.4% da la populaziun èn da lingua franzosa) e 12.5% da las ovras èn scrittas en talian (6.5% da la populaziun èn da lingua taliana). Igl è vegnidas inoltradas mo nov ovras electronicas. Cun 146 da 236 inscripziuns èn ils umens represchentads meglier che las dunnas. E per finir pon ins constatar che 73 onns da vegliadetgna separan l'autur il pli giuven (20 onns) da l'autur il pli vegl (93 onns).

Las proximas etappas

La giuria sa reunescha quest atun duas giadas en plenum per definir sia tscherna. Ils numms da las persunas undradas cun ils emprims premis federals da litteratura, che survegnan 25 000 francs per ina, vegnan communitgads ils 3 da december 2012. A partir da december fin en matg dal 2013 vegnan organisadas en las differentas regiuns linguisticas prelecziuns cun las auturas premiadas e cun ils auturs premiads.

¹ tenor: Sprachenlandschaft in der Schweiz, Georges Lüdi, Iwar Werlen, UST, Neuchâtel 2005

Las categorias dals premis

La cerimonia per la surdada dals premis ha lieu durant la Sentupada Litterara a Soloturn en matg 2013. Ultra dals premis federals da litteratura communitgads en december, premiescha l'Uffizi federal da cultura en mai er diversas personalitads da la scena litterara svizra.

Il «Premi svizzer da litteratura» vegn surdà ad ina autura u ad in autur per sia ovra cumpletta. Il «Premi svizzer da translaziun» undrescha ina translatura u in translatur per sia lavur excellenta. Il «Premi spezial da litteratura» distingua ina personalitad che s'engascha en maniera excepziunala per la litteratura svizra, per exempel en l'intermediaziun, l'ediziun, la producziun, la critica litterara, la politica da cultura u l'instrucziun e la retschertga.

Infurmaziuns

Christine Chenaux, promoziun da la litteratura, Secziun creaziun culturala, Uffizi federal da cultura,
+41 (0)31 322 9265, christine.chenaux@bak.admin.ch

Franziska Burkhardt, scheffa da la Secziun creaziun culturala, Uffizi federal da cultura,
+41 (0)31 324 9823, franziska.burkhardt@bak.admin.ch